



Llywodraeth Cymru
Welsh Government

Paul Davies AS

Cadeirydd, Pwyllgor yr Economi, Masnach a Materion Gwledig

2 Mawrth 2022

Annwyl Paul,

Diolch am eich adroddiad drafft ar 14 Chwefror yn dilyn fy nhystiolaeth i'r Pwyllgor ar 20 Ionawr ar gynlluniau gwario'r Economi yng Nghyllideb Ddrafft 2022-23.

Atodir ein hymateb i adroddiad y Pwyllgor.

Yn gywir,

A handwritten signature in black ink that reads "Vaughan Gething". The signature is written in a cursive, flowing style.

Vaughan Gething AS/MS

Gweinidog yr Economi

Minister for Economy

Argymhelliad 7. Dylai Llywodraeth Cymru roi dadansoddiad i'r Pwyllgor o'r dyraniad cyllid a'r amcanion cysylltiedig ar gyfer y cynllun gweithredu a fydd yn cefnogi Dewch i Lunio'r Dyfodol.

Ymateb: Derbyn

Ym mis Mawrth 2021, cyhoeddodd Llywodraeth Cymru gynllun adfer ar gyfer yr economi ymwelwyr, 'Dewch i Lunio'r Dyfodol', sydd wedi bod yn brif ffocws gweithgarwch dros y flwyddyn ddiwethaf fel ffocws tymor byr a chanolog pwysig i gefnogi'r adferiad ar ôl y pandemig. Bydd y gwaith o gyflawni'r cynllun adfer yn dod i ben ar ddiwedd y flwyddyn ariannol gyfredol. Bydd adroddiad cyflawni yn cael ei gyhoeddi cyn bo hir ac rydym yn awr yn symud yn ôl i'n cynllun strategol hirdymor, 'Croeso i Gymru: blaenoriaethau i'r economi ymwelwyr 2020-25'.

Goblygiadau Ariannol

Mae'r Cynllun Busnes ar gyfer 2022-23 yn cael ei ddatblygu i gyflawni ein blaenoriaethau Croeso i Gymru a bydd yn darparu cydbwysedd rhwng gwariant cyfalaf a refeniw i gefnogi'r sector yn uniongyrchol drwy'r cyfnod adfer parhaus a datblygu cynnig twristiaeth gynaliadwy ymhellach. Roedd Cyllideb ddrafft Llywodraeth Cymru ar gyfer 2022-23 yn dyrannu o £5m o gyfalaf a £11.962m o refeniw ar gyfer twristiaeth. Byddwn yn falch o ddarparu dadansoddiad manylach o'r dyraniadau ar ôl cwblhau'r Cynllun Busnes.

Argymhelliad 8. Dylai Llywodraeth Cymru ystyried datblygu pecyn o gymorth wedi'i dargedu i gefnogi adferiad economaidd yn y sectorau hynny yr effeithiwyd arnynt fwyaf gan y cyfyngiadau diweddar.

Ymateb: Derbyn

Mae Busnes Cymru, Banc Datblygu Cymru a chymorth Datblygu Rhanbarthol ac Arloesi drwy Lywodraeth Cymru yn darparu gwybodaeth, arweiniad, cyngor a chymorth pwrpasol ac rydym yn dal i adolygu'r cymorth sydd ei angen ar fusnesau i gychwyn, i ddal ati ac i dyfu.

Goblygiadau Ariannol

Mae cyllid wedi cael ei sicrhau hyd at fis Mawrth 2025 i barhau i ddarparu'r cymorth pwrpasol sydd ar gael drwy Lywodraeth Cymru ac mae swyddogion yn gweithio ar fanylion y ddarpariaeth ar gyfer y cyfnod hwn. Mae modd teilwra'r ddarpariaeth bresennol i ddiwallu anghenion rhanbarthau neu sectorau lle mae angen hynny er enghraifft. Fodd bynnag, os bydd angen ehangu'r ddarpariaeth, byddai hyn yn golygu bod angen sicrhau cyllid ychwanegol.

Argymhelliad 9. Dylai Llywodraeth Cymru roi manylion y gweithgaredd penodol y bydd y dyraniadau refeniw a chyfalaf ar gyfer y Banc Cymunedol yn cael eu defnyddio i'w cefnogi.

Ymateb: Derbyn

Mae ein gweledigaeth ar gyfer Banc Cymunedol Cymru yn seiliedig ar y model cydfuddiannol, sy'n eiddo i ac yn cael ei redeg er budd ei aelodau, yn hytrach na sicrhau'r elw mwyaf posibl i gyfranddalwyr. Bydd yn fanc cymunedol modern,

gwasanaeth llawn, sydd â'i bencadlys yng Nghymru. Bydd yn darparu mynediad at gynnyrch a gwasanaethau dwyieithog, drwy amrywiaeth o sianeli gan gynnwys digidol, ar-lein ac yn y gangen.

Rhoddais Ddatganiad Llafar ar 14 Rhagfyr 2021 yn rhoi'r wybodaeth ddiweddaraf am gynnydd Banc Cambria, gan groesawu'r cyhoeddiad gan Gymdeithas Adeiladu Sir Fynwy (MBS) yn datgan ei bwriad i ddatblygu ei dull o ddarparu banc cymunedol yng Nghymru.

Rydym wedi ymrwmo i gefnogi'r gwaith o greu Banc Cymunedol i Gymru, gan weithio'n agos gyda Cambria Cydfuddiannol Cyf a Chymdeithas Adeiladu Sir Fynwy, gan ymateb a darparu cymorth priodol, wrth iddynt barhau i ddatblygu eu cynlluniau cyflawni strategol a gweithredol i sefydlu Banc Cambria.

Gan adeiladu ar y cynnig amlinellol gan Gymdeithas Adeiladu Sir Fynwy yn 2021, rhagwelir y bydd cynnig buddsoddi manwl yn cael ei gyflwyno yn ystod 2022 yn gofyn am fuddsoddiad masnachol gan Lywodraeth Cymru a buddsoddwyr eraill.

Mae'r dyraniad cyfalaf sydd wedi'i neilltuo ar gyfer Banc Cymunedol yn sefydlu'r capasiti i ystyried buddsoddiad o'r fath maes o law ar delerau masnachol.

Goblygiadau Ariannol

Rwyf yn gyfrifol am y Banc Cymunedol yn ystod ei gam datblygu, gyda chymorth cyllid refereniw o £0.150m dros 2022-23 a 2023-24 ar gyfer datblygu polisi ac ymchwil parhaus drwy gaffael arbenigedd / adroddiadau allanol mewn meysydd fel asesu effaith economaidd, diwydrwydd dyladwy ariannol a chyngor cyfreithiol.

Mae fy nghyd-Aelod y Gweinidog Cyfiawnder Cymdeithasol yn arwain ar y buddsoddiad cyfalaf i sefydlu'r Banc Cymunedol. Mae sefydlu'r Banc Cymunedol gan Gymdeithas Adeiladu Sir Fynwy yn dibynnu ar gyflwyno cyfalaf newydd i'r Gymdeithas. Mae'r rhain yn gyllidebau 3 blynedd ac felly nid ydynt yn cynnwys gofynion am gyfalaf ar gyfer y blynyddoedd wedi hynny. Disgwylir cynnig buddsoddi llawn gan Gymdeithas Adeiladu Sir Fynwy yn rhan olaf 2022 a bydd hwn yn fasnachol.

Argymhelliad 10. Dylai Llywodraeth Cymru hysbysu'r Pwyllgor ar sail flynyddol am y cynnydd yn erbyn ei tharged o ddyblu maint y sector eiddo i weithwyr erbyn diwedd y Senedd hon.

Ymateb: Derbyn

Mae Perchnogaeth Gweithwyr Cymru yn rhan o raglen Busnes Cymdeithasol Cymru a ariennir gan Lywodraeth Cymru a Chronfa Datblygu Rhanbarthol Ewrop hyd at fis Mawrth 2023. Ar ôl mis Mawrth 2023 mae cyllid wedi cael ei sicrhau drwy Lywodraeth Cymru i fwrw ymlaen i gefnogi a hyrwyddo perchnogaeth gan y gweithwyr yng Nghymru.

Darperir cyngor pwrpasol wedi'i ariannu'n llawn i helpu i benderfynu ai Cynlluniau Cyfranddaliadau a Pherchnogaeth gan y Gweithwyr yw'r ateb cywir i'r busnes. Bydd

dewisiadau'n cael eu harfarnu ac wedyn goruchwylir y gwaith o ddylunio a gweithredu'r strwythur perchnogaeth gan y gweithwyr a fydd yn cael ei ddewis.

Ar hyn o bryd mae gan Gymru 30 o fusnesau cwbl weithredol sy'n eiddo i'r gweithwyr, gyda phedwar o'r rhain wedi'u ffurfio yn 2020.

Yn ddiweddar, cymeradwyodd Llywodraeth Cymru £0.070m o gymorth ychwanegol i hyrwyddo perchnogaeth gan y gweithwyr yng Nghymru. Bydd y cyllid yn helpu i gefnogi'r gwaith o ddatblygu deunyddiau marchnata ac ymgyrchoedd ar gyfer perchnogaeth gan y gweithwyr.

Goblygiadau Ariannol

Dim goblygiadau ariannol gydag ymrwymiad parhaus i Busnes Cymru a Banc Datblygu Cymru.

Argymhelliad 11. Dylai Llywodraeth Cymru roi'r wybodaeth ddiweddaraf i'r Pwyllgor am ganlyniadau eu trafodaeth â Banc Datblygu Cymru, gan gynnwys ynghylch eu hadnoddau a sut y gall gefnogi busnesau i lwyddo.

Ymateb: Derbyn

Mae Banc Datblygu Cymru'n rhan allweddol o strategaeth Llywodraeth Cymru i gefnogi economi Cymru drwy ei gwneud hi'n haws i fusnesau gael y cyllid sydd ei angen arnynt i gychwyn, i gryfhau ac i dyfu. Mae gan y Banc Datblygu lefel uchel o gyfalaf ac mae'n gallu cynnig atebion cyllid sy'n seiliedig ar ddyled ac ecwiti, drwy bortffolio o 16 cronfa fyw sy'n berthnasol i fusnesau ar wahanol gamau yn eu datblygiad a'u twf.

Cyhoeddodd Llywodraeth Cymru Lythyr Cylch Gwaith Tymor y Llywodraeth i Fanc Datblygu Cymru ym mis Tachwedd 2021. Mae'r Cylch Gwaith hwn yn datgan nodau polisi lefel uchel ar gyfer Banc Datblygu Cymru, yn pennu cyfeiriad a ffocws Banc Datblygu Cymru yn ystod tymor y Llywodraeth hon ac yn darparu pwynt cyfeirio i Weinidogion Cymru o ran rheoli perfformiad cyffredinol Banc Datblygu Cymru. Mae'r llythyr Cylch Gwaith yn cyfeirio'n benodol at ymrwymadau'r Rhaglen Lywodraethu y disgwylir i Fanc Datblygu Cymru chwarae rhan allweddol yn y gwaith o'u cyflawni, yn benodol: (i) ehangu mynediad at gyfalaf tymor estynedig, a (ii) cynyddu'r defnydd o gyfrannau ecwiti.

Gan ymateb i'r Llythyr Cylch Gwaith, ym mis Mai 2022 bydd Bwrdd Banc Datblygu Cymru yn cyflwyno Strategaeth Gorfforaethol ar gyfer y cyfnod 2022-27 a fydd yn mynd i'r afael â'r prif amcanion polisi a heriau sefydliadol.

At ei gilydd, buddsoddodd y Banc Datblygu £197.6 miliwn ym mlwyddyn ariannol 2020/21. Er bod £92 miliwn o fenthyciadau wedi dod o Gynllun Benthyciadau Busnes Covid-19 Cymru i gefnogi cwmnïau drwy'r pandemig, roedd buddsoddiadau o'r holl gronfeydd 'busnes fel arfer' wedi aros yn sefydlog. Roedd £105.6 miliwn wedi darparu ystod o gymorth i fusnesau ar draws pob rhan o'r economi ac ar bob cam ar y llwybr twf.

Yn y flwyddyn ariannol gyfredol hon, yn ystod y cyfnod o naw mis rhwng mis Ebrill a mis Rhagfyr 2021, gwnaeth y Banc Datblygu £79 miliwn o fenthyciadau a buddsoddiadau ecwiti i dros 300 o fusnesau yng Nghymru ac mae ar y trywydd iawn i gyrraedd targedau ar gyfer y flwyddyn.

Cafodd ymrwymiad parhaus Llywodraeth Cymru i gymorth busnes ei ddangos yn glir drwy gyfalafiad sylweddol, gwerth £270m, Cronfa Buddsoddi Hyblyg Cymru yn 2021. Mae'r cam hwn yn bont a fydd yn caniatáu i'r sefydliad gynnal lefelau benthyca i fusnesau wrth i fynediad at gronfeydd yr UE ddod i ben.

Ar ddiwedd blwyddyn ariannol 2020/21, roedd gan y Banc Datblygu £724m o gyfalaf cyffredinol a chyfalaf trafodion ariannol ar gael i'w fuddsoddi mewn blynyddoedd i ddod yn unol ag achosion busnes y cytunwyd arnynt. Mae hyn yn rhoi'r banc mewn sefyllfa i wneud buddsoddiadau busnes ac eiddo ar gyfradd o dros £130m y flwyddyn ar gyfartaledd dros y 7 mlynedd nesaf – gan gynnal cyflenwad o gyllid hygyrch i fusnesau.

Mae'r banc wedi'i strwythuro fel sefydliad cenedlaethol er mwyn iddo gefnogi busnesau ledled Cymru yn llwyddiannus. Mae ganddo dros 80 o reolwyr buddsoddi sy'n cefnogi anghenion busnesau o'i swyddfa yn Wrecsam, Caerdydd, Llanelli, Cyffordd Llandudno a'r Drenewydd. Mae'n parhau i weithio'n agos gyda phob sefydliad busnes a rhanddeiliaid yn ecosystem ariannol Cymru, gan gynnwys Busnes Cymru a Chanolfan Cydweithredol Cymru.

Goblygiadau Ariannol

Dim goblygiadau ariannol.

Argymhelliad 12. Dylai Llywodraeth Cymru roi mwy o fanylion am y risg i ddyfodol Busnes Cymru a nodi'r goblygiadau i fusnesau os na chaiff cyllid cyffredinol ar gyfer Busnes Cymru ei gynnal ar y lefel bresennol.

Ymateb: Derbyn

Mae cyllid wedi cael ei sicrhau hyd at fis Mawrth 2025 fel rhan o gynigion cyllideb ddrafft Llywodraeth Cymru, i sicrhau bod gwybodaeth, arweiniad, cyngor a chymorth i fusnesau yng Nghymru yn parhau drwy wasanaeth Busnes Cymru. Mae sicrhau cyllid hyd at fis Mawrth 2025 wedi'i wneud ar draul gweithgareddau eraill a dulliau ariannol o gefnogi datblygiad busnes ac arloesedd.

Goblygiadau Ariannol

Dim goblygiadau ariannol.

Argymhelliad 13. Dylai Llywodraeth Cymru nodi sut y mae'n bwriadu gwario'r dyraniad ar gyfer gradd-brentisiaethau a'i chynlluniau ar gyfer ehangu'r cyrsiau a chynyddu amrywiaeth gradd-brentisiaid yn unol ag adroddiad 2020 Pwyllgor yr Economi, Seilwaith a Sgiliau.

Ymateb: Derbyn

Rydym yn bwriadu gweithio'n agos gyda Chyngor Cyllido Addysg Uwch Cymru (CCAUC) a rhanddeiliaid eraill i ystyried ehangu'r rhaglen Gradd-brentisiaeth. Disgwylir y bydd y gwaith ehangu'n canolbwyntio ar raglenni presennol ym maes Digidol/TGCh a Gweithgynhyrchu Uwch yn ogystal â datblygu llwybrau newydd sy'n seiliedig ar gynlluniau cyflogaeth a sgiliau Partneriaethau Sgiliau Rhanbarthol, canlyniadau'r gwerthusiad o'r rhaglen, blaenoriaethau buddsoddi a'r gyllideb. Mae'r gwerthusiad yn cynnwys casglu barn dysgwyr. Rydym eisoes yn gweithio gyda CCAUC i wella'r gwaith o farchnata gradd-brentisiaethau er mwyn ysgogi'r galw gan ddysgwyr a chyflogwyr, gan ganolbwyntio'n benodol ar gyrhaeddiad rhaglenni.

Goblygiadau Ariannol

Mae £22m wedi cael ei sicrhau yn Llinell Wariant yn y Gyllideb Dysgu Seiliedig ar Waith ar gyfer y tair blynedd nesaf i gefnogi buddsoddiad i ehangu'r rhaglen Gradd-brentisiaeth. Bydd y gyllideb hon yn cael ei throsglwyddo i'r Prif Grŵp Gwariant Addysg a'r Gymraeg er mwyn i CCAUC allu cyflwyno'r rhaglen, gan weithio'n uniongyrchol gyda'r sector prifysgolion ledled Cymru.

Argymhelliad 14. Dylai Llywodraeth Cymru nodi'n glir i'r Pwyllgor sut mae'r gyllideb hon yn cefnogi'r amcan o ennill cyllid cystadleuol ar gyfer ymchwil ac arloesi i ddisodli cyllid yr UE, a fydd yn cael ei golli i Gymru.

Ymateb: Derbyn mewn egwyddor

Rydym wedi cyflawni ar yr argymhelliad i ailgyflwyno cronfa arloesi; cafodd £15m ei ddarparu yn 2021-22, ochr yn ochr ag £81.7m ar gyfer ymchwil ansawdd i CCAUC. Rydym hefyd wedi darparu £2m o gyllid ychwanegol ar gyfer Rhwydwaith Arloesi Cymru. Cafodd y Rhwydwaith ei sefydlu mewn ymateb i adroddiad 2020 yr Athro Graeme Reid, 'Cryfder mewn Amrywiaeth', a oedd yn argymhell creu menter newydd i fanteisio ar amrywiaeth capasiti ymchwil ac arloesi Cymru drwy gydweithio.

Byddwn yn parhau i weithio ar draws Cabinet Llywodraeth Cymru, gydag UKRI ac Innovate UK ac rydym wedi ymrwmo i gynyddu ymchwil ac arloesedd gyda phwyslais cynyddol ar Ymchwil, Datblygu ac Arloesi yn nes at y farchnad ac sy'n cyd-fynd ag anghenion diwydiannol, busnes a chymdeithasol Cymru. Rydym yn gweithio ar draws y Llywodraeth, a chyda CCAUC, i ddatblygu cynlluniau i gefnogi rhagor o geisiadau o ansawdd uchel i Lywodraeth y DU a ffynonellau allanol eraill o gyllid ymchwil ac arloesi. Bydd y cynlluniau hyn yn cyd-fynd ag anghenion presennol yr ecosystem Ymchwil, Datblygu ac Arloesi, a byddant yn dibynnu ar gydweithio cryf, meithrin gallu a chapasiti, yn hytrach na chyfnewid gweithgareddau a oedd yn cael eu hariannu gan yr UE am weithgareddau union yr un fath.

Nid un o swyddogaethau cyllideb Llywodraeth Cymru yn unig yw ennill cyllid ymchwil ac arloesi cystadleuol. Bydd angen i bartneriaid – yn enwedig mewn addysg bellach ac uwch yn ogystal â diwydiant – ailystyried eu dull gweithredu ac, yn hollbwysig, bydd angen i Lywodraeth y DU a chyrrff ariannu'r DU fynd i'r afael â'r anghydbwysedd sylweddol yn y ffordd y caiff cronfeydd ymchwil ac arloesi'r DU eu dargyfeirio tuag at dde-ddwyrain Lloegr. Byddai cyhoeddiadau diweddar Llywodraeth y DU am "godi'r gwastad" yn gyfystyr â £9m yn fwy o gyllid ymchwil ac arloesi i Gymru tra bod £60m wedi'i golli oherwydd- er gwaethaf addewidion pendant mynych – nad oes cyllid llawn wedi'i roi yn lle cronfeydd yr UE. Felly, mae diffyg o £51m yn ogystal â

dargyfeirio cronfeydd ymchwil ac arloesi'r DU oddi wrth Gymru a nifer o ranbarthau Lloegr.

Goblygiadau Ariannol

Mae Cyllideb Ddrafft 2022-23 yn cynnal lefel y cyllid i CCAUC. CCAUC fydd yn penderfynu sut bydd yn dosbarthu'r arian a ddyrennir.

Argymhelliad 15. Mae Pwyllgor yr Economi, Masnach a Materion Gwledig a'r Pwyllgor Plant, Pobl Ifanc ac Addysg yn argymhell ar y cyd y dylai Llywodraeth Cymru nodi dadansoddiad o'r cyfraniadau gan bob Prif Grŵp Gwariant – ar lefel llinell wariant yn y gyllideb – sy'n cyfuno i wneud y cyfanswm o £500 mewn ariannu yr amcangyfrifir sydd ei angen er mwyn cyflawni'r Warrant i Bobl Ifanc. Dylai'r dadansoddiad hwn ei gwneud yn glir beth yw cyllid newydd a beth sy'n barhad o raglenni presennol.

Ymateb: Derbyn

Rydym yn buddsoddi dros £500m yn y Warrant i Bobl Ifanc yn 2022-23. Bydd hyn yn cynnwys:

- Mae £20 miliwn o gyllid newydd wedi cael ei ddyrannu y Mhrif Grŵp Gwariant yr Economi i'r Llinell Wariant yn y Gyllideb Cyflogadwyedd gan gynnwys y Warrant i Bobl Ifanc i gefnogi'r garfan newydd ddisgwyliedig o Bobl Ifanc nad ydynt mewn Addysg, Cyflogaeth na Hyfforddiant (NEET) yn 2022-23.
- Bydd £513.8m o gyllid presennol yn parhau i gefnogi'r bobl ifanc 16-24 NEET hynny drwy ymyriadau niferus, ac yn cael ei ategu gan wasanaeth cynghori Cymru'n Gweithio, a ddarperir gan Gyrfa Cymru. Dyma amcangyfrif o'r cyfraniadau fesul Prif Grŵp Gwariant:
 - £463.5m yn y Prif Grŵp Gwariant Addysg a'r Gymraeg;
 - £47.9m ym Mhrif Grŵp Gwariant yr Economi; a
 - £2.4m yn y Prif Grŵp Gwariant Cyllid a Llywodraeth Leol.

Dangosir manylion y cyllid ar lefel Llinell Wariant yn y Gyllideb yn y tabl isod.

Llinell Wariant yn y Gyllideb	Prif Grŵp Gwariant Addysg a'r Gymraeg £000	Prif Grŵp Gwariant yr Economi £000	Prif Grŵp Gwariant Cyllid a Llywodraeth Leol £000	Cyfanswm £000
Darpariaeth ôl-16	463,500			463,500
Cyflogadwyedd gan gynnwys y Warrant i Bobl Ifanc		44,000		44,000
Cymunedau am Waith		790		790
Grant Plant a Chymunedau			2,400	2,400
Rhieni, Gofal Plant a Chyflogaeth		600		600
Busnes Cymru		2,500		2,500
Cyllideb bresennol	463,500	47,890	2,400	513,790

Cyflogadwyedd gan gynnwys y Warant i Bobl Ifanc		20,000		20,000
Cyllideb newydd	-	20,000	-	20,000
Cyfanswm y gyllideb	463,500	67,890	2,400	533,790

Goblygiadau Ariannol

Dim, gan fod yr argymhelliad yn ymwneud â rhoi'r wybodaeth ddiweddaraf i'r Pwyllgor.

Argymhelliad 16. Dylai Llywodraeth Cymru ystyried dyrannu cyllid penodol i sicrhau bod busnesau Cymru yn gallu manteisio i'r eithaf ar gyfleoedd a pharatoi ar gyfer newidiadau sy'n deillio o gytundebau masnach rydd newydd.

Ymateb: Gwrthod

Mae ein Rhaglen Lywodraethu yn ein hymrwymo i gyflawni rhaglen uchelgeisiol o gymorth allforio drwy weithredu'r Cynllun Gweithredu Allforio i Gymru. Nod cyffredinol y Cynllun yw creu sector allforio cryf, bywiog a chynaliadwy; a rhoi ystod gynhwysfawr o raglenni allforio ar waith i gefnogi busnesau ar eu taith allforio. Mae hyn yn amrywio o ysbrydoli busnesau i allforio; meithrin gallu allforio; helpu busnesau i ddod o hyd i gwsmeriaid tramor; a chael mynediad at farchnadoedd tramor, gan gynnwys y rheini lle cytunir ar Gytundebau Masnach Rydd. O fewn hyn, mae'r cynllun yn cynnwys camau gweithredu i gefnogi busnesau i baratoi ar gyfer unrhyw gytundebau masnach rydd newydd a manteisio i'r eithaf arnynt, gan gynnwys, er enghraifft, drwy gymorth a chyngor 'ar lawr gwlad' drwy ein tîm o Gynghorwyr Masnach Ryngwladol, sy'n gweithio ledled Cymru; rhaglen o weminarau ar bynciau a marchnadoedd allforio penodol; teithiau masnach i farchnadoedd allweddol; a thrwy ein menter clwstwr allforio newydd. O ystyried ehangder y gweithgarwch sy'n cael ei gyflawni drwy'r Cynllun, ac yng nghyd-destun amgylchedd masnachu byd-eang sy'n newid yn barhaus, mae'n bwysig bod digon o hyblygrwydd yn y gyllideb i gyflawni'r holl feysydd uchod. Byddwn yn parhau i adolygu ein rhaglenni a'n gweithgareddau i sicrhau y gall busnesau fanteisio ar unrhyw gyfleoedd newydd wrth iddynt ddod i'r amlwg.

Yn ogystal â'n cynllun allforio, bydd swyddogion yn gweithio ar draws Llywodraeth Cymru i sicrhau bod pawb sy'n delio'n uniongyrchol â busnesau yn deall y cyfleoedd a gyflwynir gan y Cytundebau Masnach Rydd newydd a'u heffeithiau posibl. Mae'r tîm Polisi Masnach eisoes wedi dechrau'r broses o weithredu rhaglen gyfathrebu fewnol i hyrwyddo'r cyfleoedd sydd ar gael i gwmnïau yng Nghymru drwy'r timau allforio, busnes a rhanbarthau sy'n hyrwyddo ac yn darparu gwasanaethau cefnogi.

Goblygiadau Ariannol

Dim

Argymhelliad 17. Dylai Llywodraeth Cymru gadw'r Pwyllgor i'r funud o ran datblygiadau swyddi rheoli ffiniau newydd yng Nghymru, yn ogystal â chanlyniadau trafodaethau mewnol a rhynglywodraethol ynghylch eu hariannu

Ymateb: Derbyn

Fel yr eglurais yn flaenorol i'r pwyllgor, rydym yn dal i fod yn y cam dylunio a chynllunio ar gyfer ein safleoedd rheoli ffiniau, gyda Chaergybi ar gam pellach yn ei ddatblygiad na De-orllewin Cymru.

Bydd y Pwyllgor yn gwybod bod Llywodraeth y DU wedi cytuno mewn egwyddor i ariannu costau adeiladu cyfleusterau parhaol a thros dro ar ôl cyflwyno hawliad am arian wrth gefn, wedi'i gefnogi gan achosion busnes ar gyfer Gogledd a De-orllewin Cymru. Er bod Llywodraeth y DU wedi cytuno'n amodol i ariannu costau adeiladu'r safleoedd rheoli ffiniau, mae wedi dweud yn benodol na fydd yn talu'r costau gweithredol. Mae swyddogion Trysorlys Cymru yn dal i gynnal trafodaethau gyda Thrysorlys EM ynghylch cyllid ar gyfer costau sefydlu a delir ymlaen llaw a chostau gweithredol.

Byddaf yn falch o roi'r wybodaeth ddiweddaraf i'r Pwyllgor yn ystod y camau allweddol.

Mae'r ansicrwydd ynghylch protocol Gogledd Iwerddon yn dal yn bryder. Fel y dywedais wrth y Senedd ddechrau'r flwyddyn, mae Llywodraeth y DU unwaith eto wedi ymestyn rheolaethau fesul cam ar gyfer symud nwyddau o ynys Iwerddon i Brydain Fawr ar ôl 1 Ionawr 2022; gan greu ansicrwydd i'r Llywodraeth ac i eraill sy'n gorfod paratoi.

Goblygiadau Ariannol

Dim, gan fod yr argymhelliad yn ymwneud â rhoi'r wybodaeth ddiweddaraf i'r Pwyllgor.